

# **PILLIMONO**

## **Pollone Ye PILLIMONO Pepá**

## **Topa Sirimu Bokumu**

*Pollone I Pepá Topa Sirimumunge Ungu Pulu Mare*

*Pollo kinie yuni pepá topa sirimumanga ungu pulu mare inie yakondo gomo 714 molemo.*

*'I pepámo Romo ka ulkena pepalie torumu.' ningú pilimele. 'Epesasi kinie Pillipai kinie Kollosi kinie aku taonomanga yambomanga pepáma yu ka ulke teluna pepalie torumula.' ningú pilimele.*

*Pillimono yu ye aili molopa yambo mare yunge kongono we tenjiku mele kalolime naa lili yamboma nokopa molorumu. Yunge kongono we tenjili ye te, Onesimasi nilimu, kowa pupe Romo purumu kinie Pollonga ungumu pilipe konopu alowa tepa 'Kirasi sike.' nimbe tondolo mundupe pilirimu. Pe yuni Pollo nokorumu.*

*Kongono we tenjili yamboma kowa pulimele kinie Romo gapomano ungu mane tene nimbendo: 'Mongo liku singindu toko konjengi.' nimbe perimu. Nakolo Pollone Onesimasi konopu monjipe Pillimono pepá topa sipelie nimbendo: 'Yu altoko ulkena liku "Ano." ningú taka lelko nokani.' nirimu. Nakolo Pollone Pillimono aku sipe mele mawa tembando sumbi sipe naa nimbe ou ungu mare we nirimumunge ungu marenaga ungu pulumu mindili sипу pilimolo. Kowa purumu ye Onesimasinge imbimu kolomongo kanga 10*

*pulu monjipe nimbe, pepámo topa pora simbendo  
kamu ungu te mawa terimu.*

*Ya ungu pulumu pora nikimu.*

<sup>1-2</sup> Na Pollo, Kirasi Yesusinge kongono tenjil-  
iomonga ka ulkena pelio yemo, na kinie olianga  
angenu Timoti pea molopololie i pepámo topo  
sikiru.

Oltonga paa pulu lemo ye Pillimono, tapu  
topo kongono telemolo yemo, nu kinie, olianga  
kemulu Apia keme, olio pea tapu topo opa teli  
ye Akipasi keme, Kirasinge yambo talape\* Pil-  
limono nunge ulkena maku tolemele yamboma  
kinie, ene i pepámo topo sikiru.

<sup>3</sup> Olianga Lapa Pulu Yemo kinie Aili Yesusi  
Kirasitolone\* ene we kondo kolkolo, ‘Ene konopu  
pe nipili taka lelko molangi.’ niengili.

<sup>4-5</sup> Nanga pulu lemo ye „Pillimono„, nu Aili  
Yesusi „molopa, olianga nimbe tenjirimu tenjil-  
imo mele, ‘Sike.’ ningu tondolo munduku pilku  
molko,\* Pulu Yemonga yamboma pali konopu  
monjiku moleno mele pilipulie Pulu Yemo kinie  
ungu nimbundu alieli nunge mawa tenjipu,  
nanga Pulu Yemo kinie “Ange.” nilio.

<sup>6</sup> Pulu Yemo kinie nunge mawa tenjipulie, ‘Nu  
kinie olio ‘Yesusi Kirasi, sike’ nimbu tondolo  
mundupu pilimolomonga konopu teluna pupili  
tapu topo molemolo ulumuni nu paa pilipe  
konginjilimu sipili. Aku pilipe konginjilimu  
pemba kinie Kirasinge mele peanga olio silimo  
limulúma kamu tondolo munduku pilini.’ nilio.

<sup>7</sup> Nuni, ango, Pulu Yemonga yamboma konopu  
monjikulie konopu peanga pepili molonge uluma

tenjirinu mele pilipulie na konopu sipu konopu paa tondolo pupili molio.

<sup>8</sup> Nane nu ulu te ‘tei.’ nimbu mawa tembo tekero akumu nu kinie olto Kirasinge yetolo molembolomonga ‘Nu paa sike tei.’ nimbu tondolo mundupu manda nilke nakolo „nuni teleno mele nikiru aku siku molko Pulu Yemonga yamboma kondo kolko teleno, akumunge

<sup>9</sup> „aku sipu naa nimbú..”\* Konopu monjili ulumuni olto lipé tere lenjipe ‘Teluna molangili.’ nilimona aku sipu molembolomonga nane „‘Nu i siku tei.’ nimbu tondolo mundupu naa nimbu, ‘Ulu te teani.’ nimbu, nu taka lepo mawa tembo tekero. Sike na Pollo, na ye andamo,\*\* Kirasi Yesusinge kongono tenjiliomonga ka ulkena peilio, na aku sipu yemo moliomonga

<sup>10</sup> nanga malo Onesimasinge mawa tenjipulie ‘nuni yu teko konjeni.’ nikiru. Na ka ulkena pepolie yu mane sirindu kinie yu „konopu alowa tepa, ‘Kirasi, sike.’ nimbe tondolo mundupe pilipe ‘Kirasinge yemo, molorumu mele molemomonga kinié yu nanga malo ‘mele’, na yunge lapamo molio.

<sup>11</sup> Ou sike yuni nunge kongono peanga te mimi sipe naa tenjirimu nakolo kinié nu kinie olto pea yuni mimi sipe lipé taponjipe kongono tenjimbe yemo molemo.

<sup>12</sup> Kinié yu nu molenona “Kelko pui.” nikiru nakolo pukumu kinie na paa konopu umbuni tekemo.

<sup>13</sup> Na temane peangamo topo silipu andorundumunge ka siringi ka ulkena pelio kinie Onesimasini nunge kolo wangopa “Na liku taponjiku

ka ulkena nokani moloi.” nilke

<sup>14</sup> nakolo ‘nuni paa sike na liku taponjeni kene nu molenona yu ou naa opili. Yu pipi sipu nunge nimbe na lipe taponjipili.’ nimbu we karaye tepo naa nimbú. ‘Nu nunu konopuni pilkulie teani.’ nimbu ‘nu molenona yu opili.’ nikiru. ‘Nu molenona ombá kinie yu pe molopa temba mele nu nunu pilieni!’,

<sup>15</sup> Pe nu molonine kelepa sukundu ombo nu kinie kamu kamu molombando Onesimasi ou wallo kolte nu molenona mundupe kelepa kolea tengah purumu molemonje.\*

<sup>16</sup> Nakolo aku liemo yu nunge kongono we tenjili kendemande yemo mindi molombando aku sipe ulumu wendo naa orumu. Yu sike nunge kongono we tenjili yemo molemo nakolo kinié akumu mindi molo. Kinié nunge angena kepe molomba kinie nuni yu paa konopu monjimunge aku sipe mele ulumu wendo orumunje. Nane Onesimasi paa konopu monjipu ‘Yu nanga paa sike kandi angenunje.’ konopu lelio. Pe yu kinie nu pea Ailimunge angenungulutolo molongelemonga kepe, yu nunge angena molopa kendemande kongonomo tenjipe konjimbemonga kepe, ‘nuni Onesimasi yu konopu monjini mele olandopamo, nane yu konopu monjilio mele maniendopa.’ konopu lekero.

<sup>17</sup> Akumunge, ‘Na nu kinie pea Kirasinge kongonomo tapu topo telembolo.’ konopu leno liemo na olka kinie “Pea molambili oi.” nilina mele yu ombá kinie “Pea molambili oi.” nieni.

<sup>18</sup> Yuni nu kinie ulu te tepa kenjirimu liemo, molo yunge pundu te nu kinie angilirimu liemo

akuma Onesimasindu “Pundu toi.” naa ningu, siye kolani. Aku punduma pali nane tombo kene nanga imbi tonjeni.

<sup>19</sup> Na Pollo, nanu aku punduma tombomonga nanga kimuni nanga imbimu i pepána tokoro. Nakolo nu na kinie pundu te angilimo, ‘aku pundumu naa nindu liemo nu we pilku moleno.’ konopu lekero. Nu na kinie pundu angilimo akumu, nane nu lipu taponjirindumunge nuconde molko konjiku mindi puni ulumu nu kinie pelemo kanumu.

<sup>20</sup> Ano, ‘Ailimunge kongono te tenjembo.’ ningu na liku taponjiku ulu peanga te teani.\* Olto Kirasinge yetolo molembolomonga nuni na konopu peanga pepili ulu te teani.

<sup>21</sup> Na paa mimi sipu pilkiru: ‘Nane “Tei.” nikiru ungumu nu paa pilku liku teni.’ konopu lepolie i pepámo nu topo sikiru. ‘Nane nu “Onesimasi kinie, teani.” nimbu mawa tekero akumu nuni paa olandopa yu liku taponjiku teni.’ konopu lekero.

<sup>22</sup> Na ungu te pea mawa tekerola: Na pilkirumu, ‘Enene Pulu Yemo kinie mawa telemele mele yuni pilipelie ‘Na ene molemelena wambo.’ nimbé.’ konopu lekero. Akumunge ‘na nunge ulke ombo pembo kene suluminia te teko mimi teko nosinjeni.’ ,nimbu mawa tekero,.

<sup>23</sup> Epaparasi, yu\* Kirasi Yesusinge kongono tenjirimununge yu ka siringi, kinié olto pea ka ulkena tapu topo pelembolomo, yuni “Nu manda molenoye?” nimbe, nimbe mundukumu.

<sup>24</sup> Na kinie pea tapu topo kongono telemolo ye Mako kinie Arisitakasi kinie\* Dimasi kinie

LLuku kinie\*\* enene “Nu manda molenoye?”  
nikimilila.

<sup>25</sup> Aili Yesusi Kirasini enenga minime we kondo  
kolopa molopili molangi.

„Aku pea nikiru.»

**PULU YEMONGA UNGU KONDEMO  
The New Testament in the No Penge Dialect of the  
Umbu-Ungu Language of Papua New Guinea  
Nupela Testamen long tokples Umbu-Ungu No Penge  
long Niugini**

copyright © 1995 Wycliffe Bible Translators, Inc.

Language: Umbu-Ungu No Penge (Umbu-Ungu)

Dialect: No Penge

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023  
d72fc3f0-db59-5dba-99c3-8bd2a84ed896